

RI LOK'OLEJ VA'IN

Ri Kacolonel nurayij chi roj man nikamestaj ta ri rutojbalil mac ri xuben rija'. Chuka' nurayij chi jantape' yekatakej ri rupixa'. Rija' oj rupixaban chi tikamolo' ki' binakel y tikati-ja' ri Lok'olej Va'in.


Jari' jun lok'olej takbel richin ri aj chicajel uchuk'a'. Nikaben ri Lok'olej Va'in richin man nikamestaj ta ri rutojbalil mac ri xuben ri Colonel. Tok nikaben ri Lok'olej Va'in, nikatij caxlan vey y nikakum ya'. Re' nikaben richin nikanataj ri rutiojil y ri ruqui'uel ri Jesucristo ri xuya' koma roj. Tok nikatij ri Lok'olej Va'in, nikac'ac'ajirisaj ri c'ulanen tzij ri kabanon riq'uin ri Chicajel Katata'.

¿Achique cami ri Lok'olej Va'in?

¿Achique roma nic'atzin ri Lok'olej Va'in?

RI CRISTO XUTIQUIRIBA' PE RI LOK'OLEJ VA'IN

C'a juba' ticamisex ri Jesucristo, tok rija' xerumol ri ru apostoli' chupan jun jay. Rija' retaman chi xe chic juba' nuben xa nicamisex. Jari' ri ruq'uisibel mul ri xuc'ul ri' quiq'uin re utzilej tak achi'a' re' tok c'a manjani tibecom. Ri Jesús xrajo' chi ri je' jantape' niquinataj rija', richin queri' xtiqiben ronojel ri rubin can chique. Jari' tok rija' xutiquiriba' pe ri Lok'olej Va'in richin yeruto' chunataxic rija'. Xuper ri caxlan vey y xuturusaj. C'ari' xubij. "Tichapa', titija'. Jare' richin ri natabel richin ri nuch'acul ri ninya' chutojic ri imac." C'a c'ari', xuchop jun kumubel richin vino y xuturusaj y xuya' chique ri ru apostoli' y xubij chique: "Tikumu' re' ivonojel. Jare' richin ri natabel richin ri nuqui'uel. . .ri xbiyin coma conojel ri yeniman ri nubi', richin yecuyutej ri quimac" (tatz'eta' c'a ri Mateo 26:26-28; Marcos 14:22-23; Lucas 22:15-20).



Tok ri Jesús c'astajinek pe chic, rija' xpe vave' chupan ri América. Vave' xerutijoj ri Nefi'i' chirij ri Lok'olej Va'in chuka' (3 Nefi 18:1-11). Chupan re ruq'uisibel tak k'ij re', tok xya'ox chic pe jun bey ri kitzij Ruk'ataj ri Jesucristo, rija' xubij chic jun mul chi nic'atzin ri Lok'olej Va'in. Jari' nic'atzin richin nikanataj rija'. Quere' c'a xubij rija': Ruc'amon c'a chi ri e c'o chupan ri K'ataj niqumol qui' binakel richin chi yec'uluman apon riq'uin ri caxlan vey y ri vino richin ri runatabal ri Ajaf Jesús (DyC 20:75).

Tasiq'uij c'a ruvech ri Mateo 26:26-28. Tac'utuj chique ri vinaki' chi tiqinojij chirij ri Va'in richin ri Ajaf tok rije' niqutij ri Lok'olej Va'in.

RI RUSAMAJIXIC RI LOK'OLEJ VA'IN

Ri lok'olej tak tz'ibanic niqik'alajirisaj chikavech achique rusamajixic ri Lok'olej Va'in. Ri vinaki' ri e c'o chupan ri K'ataj niqumol qui' ronojel domingo. Jari' niqiben richin niqiya' ruk'ij ri Dios y richin niqitij ri Lok'olej Va'in (tat'z'eta' c'a ri DyC 20:75). Nisamajix ri Lok'olej Va'in coma ri e uc'uayon ri k'atbel tzij richin ri aj chicajel uchuk'a'. Jun Teuchunel o jun Runimakul nuper ri caxlan vey, y nixuque' y nuturusaj ri caxlan vey ri' (DyC 20:76). C'a c'ari', ri caxlan vey nijach chique ri quiniman ri Ruk'ataj ri Jesucristo. C'a c'ari', jun Teuchunel o jun Runimakul nuturusaj ri ya'. Ri ya' ri' nijach chique ri quiniman Ruk'ataj ri Jesucristo. Ri Cristo xuya' vino chique ri rutijoxela' tok rija' xutiquiriba' pe rubanic ri Lok'olej Va'in. Man riq'uin vi ri', rija' xuk'alajirisaj chuvech ri José Smith chi stape' man xtikum ta vino, ri más nic'atzin ja chi nikanataj rija' tok nikatij ri Lok'olej Va'in (DyC 27:2-3). Vacami ri Chojlaxela' chupan ri Ruq'uisibel tak K'ij niqicusaj ri ya' pa ruq'uexel ri vino.

Ri Jesús xuk'alajirisaj chikavech achique rubixiquil ri lok'olej ch'oven ri nikaben pa ruvi' ri Lok'olej Va'in. Nic'atzin chi utz nikac'axaj re lok'olej ch'oven re'. Nic'atzin chuka' chi nikatij kak'ij richin xtik'ax chikavech ri achique nikabij chire ri Ajaf chi xtikaben y chuka' ri achique nusuj pe rija' chike roj. Ja c'are' ri lok'olej ch'oven ri nikanataj pa ruvi' ri caxlan vey:

Lok'olej Dios, Jumul Tata'ixel, pa rubi' ri Jesucristo, ri Ac'ajol, nikac'utuj chave chi taturusaj c'a y tach'ajch'ojirisaj re caxlan vey re' richin ri cánima checonojel ri xque-



c'uluman apon riq'uin, richin chi xtiq'uitij richin ri runatabal ri ruch'acul ri Ac'ajol, y xtiq'uit'ajajirisaj apon chavech rat, Lok'olej Dios, Jumul Tata'ixel, chi niq'uirayij niq'uiq'uen pa quivi' ri rubi' ri Ac'ajol, y chi Rija' noka' ka chiquic'u'x junelic y chuka' chi yequitakej ri rupixa' ri e ruya'on can Rija' chique, richin queri' junelic xtic'oje' c'a ri Ruxlabal quiq'uin. Amen. (DyC 20:77).

Ja c'are' ri lok'olej ch'oven ri nikanataj pa ruvi' ri ya':

Lok'olej Dios, Jumul Tata'ixel, pa rubi' ri Jesucristo, ri Ac'ajol, nikac'utuj chave chi taturusaj c'a y tach'ajch'ojirisaj re ya' re' richin ri c'anima checonojel ri xquekumun richin, richin chi xtiq'uiben richin ri runatabal ri ruqui'uel ri Ac'ajol ri xbiyin can coma rije', richin chi xtiq'uit'ajajirisaj apon chavech rat, Lok'olej Dios, Jumul Tata'ixel, chi Rija' noka' ka chiquic'u'x junelic, richin queri' xtic'oje' c'a ri Ruxlabal quiq'uin. Amen. (DyC 20:79).

Nikaben ri Lok'olej Va'in riq'uin chojmilej na'oj chuech ri Dios.

Tasiq'uij ekal ri lok'olej ch'oven richin ri Lok'olej Va'in. Catzizon chiquij chiquijujunal ri frases richin ri lok'olej ch'oven ri'. Tabij chique ri vinaki' chiri' chi tiq'uetamaj chi utzil ri ch'oven richin ri Lok'olej Va'in.

RI C'ULANEN TZIJ RI YEKACAMULUJ TOK NIKATIJ RI LOK'OLEJ VA'IN

Tok nikatij ri Lok'olej Va'in, yekacamuluj ri c'ulanen tzij ri kabanon riq'uin ri Ajaf. Jun c'ulanen tzij jari' jun lok'olej sujunic ri nuben ri Ajaf quiq'uin ri ralc'ual. Ri c'ulanen tzij ri nikaben yenatex chupan ri lok'olej ch'oven richin ri Lok'olej Va'in. Yalan nic'atzin chi roj niketamaj achique tak c'ulanen tzij re', y achique roma janíla e c'atzinel chike.

Nikasuj chire ri Ajaf chi xtikaya' ka pa k'anima ri rubi' ri Jesucristo. Riq'uin c'ari', nikak'alajirisaj chi nikarayij nika-tzekelbej ri Jesús y yojoc chupan ri Ruk'ataj rija'. Nikabij chi manjun bey xtikaben jun achique ri xtuq'uibisaj rubi' ri Jesucristo.

Chuka' nikabij chire ri Ajaf chi xtokaka chikac'u'x jantape'. Rija' xkojruto' riq'uin ronojel ri nikanojij y ri nikaben.

Roj nikabij chire ri Ajaf chi xquekatakej ronojel ri rupixa'.

Roj nikabij chi xtikaben ronojel re' tok yojkasex chuxe' ya' (tatz'eta' c'a ri DyC 20:37 y ri Mosia 18:6-10). Que c'ari',

tok nikatij ri Lok'olej Va'in, yekacamuluj ri c'ulanen tzij ri xekaben riq'uin ri Ajaf tok xojkasex chuxe' ri ya'. Vi ruc'amon chi roj nikatij re Lok'olej Va'in re', yojrujeloj c'a apon riq'uin ri Ajaf (tatz'eta' c'a ri 3 Nefi 18:1-12). Ri Ajaf xubij chi ri yebanon ronojel re' xticuyutej quimac (tatz'eta' c'a ri Mateo 26:26-28).

Ri Ajaf nubij chike chi ri ru Espiritu rija' xticanej can ki-q'uin jantape' vi yekatakej ri c'ulanen tzij ri kabanon. Jun vinek ri niyukex roma ri Espiritu xtic'oje' retamabal, ruchuk'a', y ruchojmilal, y xticuker ruc'u'x. Riq'uin c'ari', rija' xtitiquir xtuch'ec ri c'aslen richin jumul.

Tasiq'uij chic jun mul ri DyC 20:77.

¿Achique nilkabij chire ri Ajaf chi xtikaben tok nikatij ri Lok'olej Va'in?

RI NIKACH'OB TOK NIKATIJ RI LOK'OLEJ VA'IN

Nic'atzin chi nikachojmirisaj ri kac'aslen richin nikatij ri Lok'olej Va'in. Ri Ajaf xuk'alajirisaj chi man utz ta vi jun vinek nutij ri Lok'olej Va'in vi rija' macuvinek. Romari', nic'atzin chi nitzolin pe kac'u'x tok c'a manjani tikatij ri Lok'olej Va'in. Ri lok'olej tak tz'ibanic quere' niquibij: Vi jun vinek ruk'ajon ri pixa', man c'a tiya' k'ij chire richin nuc'ul ri Lok'olej Va'in. C'a jampe' vi xtutzolij ri' chupan ri rumac (tatz'eta' c'a ri DyC 46:4). Quere' nubij chuka' ri Ajaf: ". . .man tiya' k'ij chire jun vinek richin nic'uluman apon riq'uin ri nuch'acul y ri nuquiq'uel tok rix niben ri samaj ri', vi ivetaman chi rija' xa man ruc'amon ta. Roma, achique nitijon ri nuch'acul y nikumun ri nuquiq'uel y xa man ruc'amon ta, can nutij vi y nukum ka etzelanic pa ránima" (3 Nefi 18:28-29).

Tok nikatij ri Lok'olej Va'in, nic'atzin chi man nikanojij ta ri ruvach'ulef. Nic'atzin chi ch'uch'uj ri kánima y nikach'ob rij ri achique richin ri Dios. Utz nikach'ob rij ri rutojbalil mac ri xuben ri Colonel y nikamatioxij chire rija' pa kánima roma ri xuben. Nic'atzin c'a chuka' chi nikanic'oj ri kac'aslen richin queri' xtikanabej ri nic'atzin chi nikachojmirisaj chupan ri kac'aslen. Nic'atzin c'a chuka' chi nikabij pa kánima chic jun mul chi can xquekatakej ri rupixa' ri Dios.

Man nic'atzin ta chi can janíla oj choj tok nikatij ri Lok'olej Va'in. Man riq'uin vi ri', nic'atzin chi ch'uch'uj ri kánima y chi nikach'ob rij ri tzolibel c'u'x ri nic'atzin chike. Vi nika-

nojij ri utz tok nikatij ri Lok'olej Va'in, utz chuka' xtuna' ri kánima chutijic. Vi ch'ajch'oj ri kánima tok nikatij ri Lok'olej Va'in, ri Ajaf can xtuya' vi chike ri ruturusanic.

Tac'utuj chire jun vinek achique modo xtikachojmirisaj ri kac'aslen richin nikac'ul ri Lok'olej Va'in.

¿Achique xtikach'ob tok nikatij ri Lok'olej Va'in richin nuch'uch'ujirisaj ri kánima?

CH'AKA' CHIC MOCAJ RI UTZ YE'ANIC'OJ

DyC 20:75-79 (ri ruchojmirisaxic ri Lok'olej Va'in)

1 Corintios 11:27-29 (nic'atzin chi man at macuvinek ta tok natij ri Lok'olej Va'in)

RI UXLANIBEL K'IJ

“Toka’ chac’u’x ri uxlanibel k’ij richin nachajij” (Exodo 20:8; tatz’eta’ c’a chuka’ ri DyC 68:29).

¿ACHIQUE CAMI RI UXLANIBEL K'IJ?


Ri uxlanibel k’ij nel chi tzij chi jari’ jun k’ij richin uxlanen. Re k’ij re’ ya’on chike richin nikanataj ri k’ij tok ri Dios xuq’uis rutz’uquic re ruvach’ulef. Ri vuj chupan ri Biblia rubini’an Génesis nuk’alajirisaj chikavech chi ri Dios xutz’uc re ruvach’ulef y chuka’ ri caj. Ri samaj ri’ xc’achoj c’a pa vaki’ ramaj tiempo: Ri Dios xubij k’ij chique ri tak ramaj ri’: “Pa ruvuk k’ij xc’achoj ri samaj ri xuben ri Dios. Y pa ruvuk k’ij, rija’ xuxlan che ri samaj ri xuben. Y ri Dios xuturusaj ri ruvuk k’ij y xuben lok’olej chire” (Génesis 2:2-3).

Ri uxlanibel k’ij jantape’ nichajix pa tak ruvuk k’ij. Jari’ jun lok’olej k’ij ri xucha’ ri Dios richin yojuxlan che ri samaj ri nikaben k’ij k’ij, y chuka’ richin nikaya’ ruk’ij rija’.

¿Achique ri uxlanibel k’ij?

¿ACHIQUE ROMA NIC’ATZIN RI UXLANIBEL K'IJ?

Ri Jesucristo xubij chi ri uxlanibel k’ij xyatej coma ri vina-ki’ (tatz’eta’ c’a ri Marcos 2:27). Ri Ajaf xuya’ ri uxlanibel k’ij chike richin queri’ c’o c’a jun k’ij chupan ri semana tok yojnojin chirij ri Dios y nikaben ri rusamaj rija’. Man ja ta re’ jun k’ij xaxe richin yojuxlan. Jare’ xa jun lok’olej k’ij. Nic’atzin chi ch’uch’uj ri kánima y chi nikaya’ ruk’ij ri Dios chupan re k’ij re’. Tok yojuxlan che ri kasamaj ri kabanon ronojel k’ij, jari’ tok yojtiquir nikach’ob rij ri rubanobal ri Dios. Chupan re k’ij re’ c’o c’a modo richin yekacamuluj conojel ri c’ulanen tzij ri kabanon riq’uin ri Ajaf y nikilij ri



kánima riq'uin ri rubanobal ri Dios (tatz'eta' c'a ri Marcos 2:27).

¿Achiqne roma xuya' pe chike ri Ajaf ri uxlanibel k'ij?

¿ACHIQUE MODO PETENEK RI UXLANIBEL K'IJ KIQ'UIN?

Ri Dios xuturusaj ri ruvuk k'ij richin queri' xbe'oc c'a ri uxlanibel k'ij. Ri Dios xuben re' pa rutiquiribel pe re ruvach'ulef (tatz'eta' c'a ri Génesis 2:2-3). Ojer can janíla chi vinek xquichajij ri lok'olej k'ij ri'. Ri Dios xuya' re pixa' re' chique ri Israeli' chuka'. Quere' c'a xubij: "Toka' c'a chac'u'x ri uxlanibel k'ij richin nachajij" (Exodo 20:8). Tok rije' xquitakej ri uxlanibel k'ij, jari' jun retal ri xuk'alajirisaj chi can je vi rije' ri vinaki' aj c'ulanen tzij (tatz'eta' c'a ri Exodo 31:12-17 y ri Isaiás 56:1-8 y ri Jeremías 17:19-27).

Man riq'uin vi ri', ri k'atoy tak tzij quichin ri judíos xquiben q'uiy pixa' ri man nic'atzin ta pa ruvi' ri uxlanibel k'ij. Rije' xquik'ijuj rij jarupe' xacal nitiquir nuya' jun vinek chupan ri uxlanibel k'ij. Chuka' xquik'ijuj achique ruvech ximoj utz niquiben riq'uin jun colo' chupan ri uxlanibel k'ij. Ri achi'a' ri' xech'o rij ri Jesús tok rija' xeruc'achojirisaj ri yava'i' chupan ri uxlanibel k'ij. C'ari' rija' xubij chique chi ri uxlanibel k'ij xbanatej richin chi utz xuben chique ri vinaki'.

Chupan ri América, ri Nefi'i' chuka' xquitakej ri uxlanibel k'ij, achi'el c'a ri nubij ri rupixa' ri Dios (tatz'eta' c'a ri Jarom 5).

Chupan re k'ij re' ri Ajaf xuya' chic pe jun bey re pixa' re'. Xubij chi nic'atzin chi noka' chikac'u'x ri uxlanibel k'ij y chi nikachajij (DyC 68:29).

Tabij chire jun vinek chi tutzijoj achique modo petenek ri uxlanibel k'ij kiq'uin. Utz nucusaj ri lok'olej tz'ibanic: Génesis 2:2-3; Exodo 20:8; Isaiás 56:1-8; Jarom 5; Marcos 2:27; DyC 68:29.

RI K'IJ RICHIN RI AJAF

Tok manjani tic'astej pe ri Ajaf, rija' y ri rutijoxela' xquitakej ri ruvuk k'ij. Man riq'uin vi ri', tok ri Jesucristo c'astajinek pe chic chiquicojol ri caminaki', ri domingo, jari' ri xoc ri lok'olej k'ij richin ri Ajaf. Re' xban richin noka' chiquic'u'x ri vinaki' chi ri Ajaf xc'astej pe chiquicojol ri caminaki' pa jun domingo (tatz'eta' c'a ri Hechos 20:7 y ri 1 Corintios 16:2). Ri vinaki' ri e tzelkelbeyon richin ri Cristo

xquicusaj c'a ri nabey k'ij che ri semana richin xoc ri uxlanibel k'ij. Jari' utz chuka' roma e c'o chic chuka' vaki' k'ij richin samaj y jun k'ij richin uxlanen y richin ri ruya'ic ruk'ij ri Dios.

Ri Ajaf oj rupixaban chupan re k'ij re' richin nikatakej ri domingo. Ri Ajaf rubin pe chi jari' ri k'ij richin rija', y ri k'ij richin uxlanibel (DyC 59:12).

¿Achiqne roma tok xjalatej ri uxlanibel k'ij chupan ri ruvuk k'ij, c'a pa ri nabey k'ij che ri semana?

¿Achiqne xc'ulvachitej ri nabey k'ij che ri semana?

¿ACHIQUE MODO XTIKATAKEJ RI LOK'OLEJ UXLANIBEL K'IJ?

Ri Ajaf nurayij chi nikachajij ri uxlanibel k'ij. Ri Ajaf xuya' pe jun k'alajirisanic chire ri José Smith chupan ri juna' 1831. Chiri' c'a, ri Ajaf xerupixabaj ri vinaki' chupan ri Ruk'ataj chi quebe chupan ri jay richin ri lok'olej ch'oven y tiquibana' ri lok'olej tak takbel, y que'uxlan che ri quisa-maj, y tiquiya' c'a ruk'ij ri Dios (tatz'eta' c'a ri DyC 59:9-12).

Ri Ajaf nurayij chuka' chi yojuxlan che ri kasamaj ri nikaben ronojel k'ij. Jare' nel chi tzij chi man utz ta nikaben manjun samaj ri yojruk'et richin xtikaben ri lok'olej samaj richin ri Ajaf. Quere' c'a xubij ri Ajaf chique ri Israeli': "Man c'a taben samaj, ni ta chuka' ri ac'ajol, ni ta chuka' ri ami'al, ni ta chuka' ri asamajel, ni ta chuka' ri ilinel avi-chin." Can ja ri chicopi' xbix chi que'uxlan chuka' ri uxlanibel k'ij (tatz'eta' c'a ri Exodo 20:10). Ri ka profeta'i' quibin chike chi man utz ta yojc'ayin, o yojlok'on, o yojbe pan etz'anen chupan ri uxlanibel k'ij.

Ri Presidente Spencer W. Kimball xubij chi vi xa yojver y manjun nikaben chupan ri uxlanibel k'ij, quere' man nikatakej ta ri lok'olej k'ij ri'. Nic'atzin c'a chi nikanojij ri utz y nikaben ri utz chupan ri uxlanibel k'ij (tatz'eta' c'a ri *Milagro del Perdón*, pp. 94-95).

¿Achiqne cami ruc'amon richin nikaben chupan ri uxlanibel k'ij? Ri Ajaf rubin chi tikabana' jun ti va'in choj oc chupan re k'ij re'. Y tok nikaben ri va'in, tic'oje' c'a chikac'u'x achiqne ric'a'tz ri uxlanibel k'ij (tatz'eta' c'a ri DyC 59:13). Ri profeta rubini'an Isaías xubij chi man utz ta ni-

kaben xaxe ri nika' chikavech roj. Chuka' xubij chi nic'atzin chi nikabij chi ri uxlanibel k'ij jari' jun quicoten, y jari' ri lok'olej k'ij richin ri Ajaf, y ri niya'ox ruk'ij (tatz'eta' c'a ri Isafas 58:13). Nic'atzin c'a chi nikaben chojilej tak banobel. Roj xtikatakej c'a utz ri uxlanibel k'ij vi xtikaben quere':

1. Yojbe pa molojri'il richin ri Ruk'ataj ri Jesucristo.
2. Nikatijoj ki' chire ri lok'olej tak tz'ibanic y chuka' ri quich'abel ri e uc'uey kabey.
3. Yekak'ejela' ri yava'i', y tak vinaki' e ri'j chic, y ri vina-ki' ri yekajo'.
4. Nikac'axaj y nikabixaj utzilej tak bix.
5. Yojch'o riq'uin ri Chicajel Katata', nikamatioxij y nika-ya' ruk'ij.
6. Nikaben ri samaj chupan ri K'ataj ri yatajinek can chike.
7. Nikaben ri samaj ri nic'atzin richin yecolotej ri kati't kamama' e caminek chic. Chuka' nikanuc' pa jun vuj ri kabanobal ri ka familia.
8. Nikak'alajirisaj chiquivech ri ka familia ri achique nuna' ri kánima chirij ri Jesucristo. Nikatzijoj chuka' chique ri ka familia ri utzilej banobel kac'ulvachin pe chupan ri kac'aslen.
9. Nikatz'ibaj tak vuj chique ri vinaki' ri yekajo'.
10. Yojmevayin tok nic'atzin chike chi nikaben queri'.
11. Yojtzijon quiq'uin ri kalc'ual y ri kixjayil.

Vi c'o jun ri nikajo' nikaben y man ketaman ta vi utz nikaben chupan ri uxlanibel k'ij, nic'atzin chi quere' nikac'utuj ka chike roj: ¿La xquiruto' re banobel re' y xquirusiloj chubanic ri utz?

Riq'uin juba' c'o jantek tok c'o vi chi yojsamej chupan jun uxlanibel k'ij. Pero nic'atzin chi nikatij kak'ij richin man yojsamej ta chupan ri k'ij ri'. Man riq'uin vi ri', vi janila nic'atzin chi yojsamej, c'a yojtiquir na nikatakej ri uxlanibel k'ij pa kánima.

Tasiq'uij c'a ruvech ri DyC 59:9-13.

¿Achique xtikaben richin xkojfel apon riq'uin ri Chicajel Katata'?

YOJTURUSEX TOK NIKATAKEJ RI UXLANIBEL K'IJ

Vi nikatakej chi utzil ri uxlanibel k'ij, c'o modo yojturusex riq'uin ri nic'atzin chike chuvach'ulef y chuka' ri nic'atzin chire ri ka espíritu. Ri Ajaf xubij chi vi nikatakej ri uxlanibel k'ij riq'uin matioxibel y riq'uin quicoten pa kánima, roj xkojnoj riq'uin quicoten. Rija' xubij can quere': ronojel ri richin re ruvach'ulef xa ivichin, stape' c'a nic'atzin vey chive, o tziek, o ivachoch, o ri quic'ojlibal iquiej, o stape' c'o ri nic'atzin pa ruvi' ri vachinel tak iche' o ri ixoral o ri itico'n. Ja', can ronojel ri petenek chupan ri ulef chupan ri ruk'ijul, xa banon richin ri rutzil ruvech ri vinek y richin chi ri vinek nucusaj. Chuka' richin nika' chuvech ri vinek y nuya' quicoten pa ránima. Ja', xa richin chi ri vinek niqutij y niqicusaj y niquina' y niquisek, y richin chi nuya' ruchuk'a' ri ruch'acul ri vinek y nuc'astabej ri ránima (tatz'e-ta' DyC 59:13-19).

Tasiq'uuj c'a ruvech ri DyC 59:15-19.

Catzijon chiquij ri turusanic ri yekac'ul tok nikatakej ri uxlanibel k'ij.

CH'AKA' CHIC MOCAJ RI UTZ YE'ANIC'OJ


Exodo 31:14-17 (ri pixa' richin ri Moisés xuben chi ri vinaki' yecamisex vi man xquitakej ta ri uxlanibel k'ij)

Mosia 18:23; Mosia 13:16-19; Exodo 35:1-3 (tatakej ri lok'olej uxlanibel k'ij)

Hebreos 8:1-13 (ri c'ac'a' c'ulanen tzij c'o pa ruq'uexel ri ojer c'ulanen tzij)

Lucas 6:1-11 (tiquirel chi ri vinaki' niqubien ri utzilej samaj chupan ri uxlanibel k'ij)

Lucas 13:11-17; Juan 5:1-18 (Ri Jesús xuben utzilej tak samaj chupan ri uxlanibel k'ij)



RI MEVAYINEN

Ri vinaki' jantape' e mevayinek richin queri' yetiquir yejel apon riq'uin ri Chicajel Katata' y niquiya' ruk'ij rija'. Ri Jesús xmevayin chuka' y queri' nik'ax chikavech chi janíla c'atzinel chi yojmevayin (tatz'eta' c'a ri Lucas 4:1-4). Ri Ajaf xuk'alajirisaj can chupan re k'ij re' chi rija' nurayij chi ri ruvinak yemevayin y yech'o ak'anij riq'uin ri Dios binakel (tatz'eta' c'a ri DyC 88:76).

Tabixaj c'a ri bix rubini'an "Riq'uin Ronojel Kánima."

Tasiq'uij ruvech ri DyC 88:76. ¿Achique c'a roma xyatej pe ri pixa' richin chi yojmevayin?

RI KITZIJ RUBEYAL RICHIN YAMEVAYIN

Ri mevayinen nel chi tzij chi manjun vey y manjun ya' nikatij. C'o jantek utz yojmevayin roma nuben utz chire ri kach'acul y nuc'asba' ri kanojibal. Ri Colonel xubij chi man xaxe ta tikaya' can ri vey y ri ya' tok yojmevayin. Xa nic'atzin chuka' chi nikaben xaxe ri nic'atzin chire ri kac'aslen riq'uin ri Ajaf.

NIC'ATZIN CHI YOJCH'O AK'ANIJ RIQ'UIN RI DIOS TOK YOJMEVAYIN

Ri lok'olej ch'oven riq'uin ri Dios janíla nic'atzin chire ri mevayinen. Ri lok'olej ch'oven y ri mevayinen cachibilan qui' chupan ri lok'olej tak tz'ibanic. Tok yojmevayin, nic'atzin chi yojch'o riq'uin ri Dios riq'uin ronojel ri kánima. Tok nikatiquiriba' ri mevayinen, nic'atzin chi yojch'o riq'uin ri Ajaf. Y tok nikaq'uis ri mevayinen, nic'atzin chi yojch'o riq'uin ri Dios chuka'.

NIC'ATZIN CHI C'O JUN ROMA TOK NIKABEN RI MEVAYINEN

C'o q'uiy achojrroma yojmevayin. Ri mevayinen y ri lok'olej

ch'oven riq'uin ri Dios yojquito' chupan ri kac'aslen y ri kac'ayeval. C'o tak bey xtikarayij yojmevayin y yojch'o riq'uin ri Dios richin tuto' jun chic vinek. Riq'uin c'a juba' jun kach'alal janíla yava' y nic'atzin chi ri Dios nuturusaj (tatz'eta' c'a ri Mosia 27:22-23). Tok yojmevayin, roj yojtiquir niketamaj ri kitzij rubey jun achique achi'el ri xuben ri profeta rubini'an Alma ri c'o chupan ri Vuj richin ri Mormon. Quere' c'a xubij: "Yin in mevayinek, y in ch'ovinek riq'uin ri Dios q'uiy k'ij richin ninnabey ronojel re'. Vacami c'a, yin vetaman chic chi can e kitzij vi. Ri Ajaf Dios e ruk'alajirisan pe chinuvech riq'uin ri Lok'olej Ruxlabel'" (Alma 5:46). Utz yojmevayin coma ri kachibil ri man e c'o ta chupan ri K'ataj richin queri' xtiquinimaj ri kitzij. Ri mevayinen yojruto' tok janíla yojbison y tok yojok' (tatz'eta' c'a ri Alma 28:4-6). Ri mevayinen yojruto' richin nikach'uch'ujirisa'j ki' y richin yojjel apon riq'uin ri Ajaf (tatz'eta' c'a ri Elaman 3:35). Man utz ta vi yojmevayin xa richin nikac'ut ki' chiquivech ri ch'aka' chic vinaki' chi roj can oj utz vi. Ri Ajaf xubij: "Y tok yixmevayin, man tiben achi'el ri e ca'i' quipalej ri niquiben chi nibison quipalej. Roma rije' niquijel quipalej xa richin niquic'ut chiquivech ri achi'a' chi xemevayin. Kitzij c'a ninbij chive chi quic'ulun chic ri cajel. Pero rat, tok yamevayin, tamala' ak'om pa avi' y tach'aja' ri apalej, richin man nac'ut ta avi' chiquivech ri achi'a' chi xamevayin" (tatz'eta' c'a ri Mateo 6:16-18). Nic'atzin c'a chi yojquicot tok yojmevayin y man tikac'ut c'a ki' chiquivech ri ch'aka' chic vinaki' chi xojmevayin.

¿Achique xtikaben richin chi más utz nuben ri kamevayin?

¿Achique roma yojmevayin?

Tac'utuj chique ri ch'aka' chic vinaki' chi tiqubij chave achique niquich'ob chirij ri mevayinen.

RI K'IJ RICHIN MEVAY

Jun domingo chupan ronojel ic', ri vinaki' richin ri Ruk'ataj ri Jesucristo yemevayin. Chupan ri k'ij ri', nikaya' can ca'i' va'in y man nikatij ta vey, ni ya'. Yojmevayin juvinek caji' (24) horas. Vi nikatij vey ri tikak'ij ri sábado, man c'a xtikatij ta chic manjun, xa c'a tikak'ij domingo. C'ari' utz yojva'.

Ronojel ri vinaki' ri yetiquir yemevayin, nic'atzin chi yemevayin. Ch'aka' xa manek cuchuk'a' o man utz ta quiraxnakil. Ch'aka' ixoki' c'o chi niquiya' rutz'um ri cal. Ri vinaki'

ri queri' quibanon, man nic'utux ta chique chi c'o chi yemevayin. Y ri te'ej tata'aj man utz ta niquiben chique ri tak calc'ual chi c'o chi yemevayin.

Utz yekato' ri kalc'ual richin yemavayin tok xekasex yan chuxe' ya'. Man riq'uin vi ri', man utz ta nikaben chique chi can quemevayin. Ri k'ij richin mevayinen, jari' jun utzilej k'ij richin nikach'uch'ujirisaj ki' chuvech ri Ajaf. Romari' tok yojmevayin y yojch'o riq'uin ri Dios chupan ri k'ij ri'. Utz nikac'utuj kacuyubal mac chupan re k'ij re'. Utz chuka' nikac'utuj kuchuk'a' richin queri' nikach'ec ri ketzela y xquekacuy ri ch'aka' chic vinaki'.

Ri vinaki' ri e c'o chupan ri K'ataj niquimol qui' chupan ri k'ij richin mevayinen, richin niquitij ri Lok'olej Va'in. Chuka' niquik'alajirisaj chiquivech ri ch'aka' chic vinaki' ri niquina' pa cáñima chirij ri rusamaj ri Ajaf. Queri' ri vinaki' niquitola' qui' chiquivech.

RI SUJUBEL RICHIN MEVAYINEN

Ri Ajaf nuc'utuj chike chi yojmevayin jun domingo chupan ronojel ic' richin yekato' ri meba'ii'. Conojel ri vinaki' ri yemevayin nic'atzin chi niquiya' ri vey o ri puek ri man xquisech ta che ri ca'i' va'in. Re' niquiya' chique ri e uc'uayon quibey chupan ri K'ataj. Nic'atzin chi nikaya' jampe' ri yojtiquir. Tok nikatoj ri sujubel richin ri mevayinen, nikaben achi'el nuben ri Ajaf, y yojto'on chuya'ic chique ri kach'alal ri achique nic'atzin chique.

¿Achique xtikaben chupan ri k'ij richin mevayinen richin chi más ch'uch'uj xtuna' ri kánima?

¿Achique roma nikatoj ri sujubel richin mevayinen?

YOJTURUSEX TOK YOJMEVAYIN

Chupan ri Ojer Retal Tziz, ri profeta Isaías nubij chi ri Ajaf janíla xqueruturusaj ri vinaki' ri yemevayin y yequito' ri ch'aka' chic ri c'o nic'atzin chique chupan ri quic'aslen. Ri Ajaf nusuj chike ri uxlanibel c'u'x y utzilej karaxnakil. Chuka' nubij chike chi rija' xkojrUYUKEJ chupan ri kac'aslen. Ri Isaías xubij chi tok yojmevayin, ri Ajaf yojruturusaj. Quere' c'a xubij: "C'a c'ari', ri asakil xtik'alajin pe achi'el ri nima-k'a', y cha'nin xtiban utz chire ri araxnakil. Y ri achojmilal xtinabiyej chavech. Y ri ruc'ojlemal ri Ajaf jari' ri xtiya'ox chave. C'a c'ari', xcasiq'uin ak'anij y ri Ajaf xtich'o pe aviq'uin. Xcach'o chire riq'uin ok'ej y rija' xtubij c'a pe, in c'o vave'" (Isaías 58:8-9).

Ri mevayinen nuchojmirisaj ri kac'aslen y nuya' más kuchuk'a'. Ri mevayinen yojrujeloj apon riq'uin ri Ajaf y queri' yojruto' richin nikatakej ri tijonic richin ri utzilej rutzijol.

RI MEVAYINEN NUYA' KUCHUK'A' RICHIN NIKAK'ET KI' CHE RI KARAYIBAL

Ri mevayinen yojruto' richin nuben choj ri kana'oj. Romari' tok janíla nic'atzin chi yojmevayin. Tok yojmevayin chi utzil, xtikel kuchuk'a' richin nikak'et ri karayibal y ri koyoval. Ri Solomón, jun nimalej rutata'al jun tinamit quere' xubij: "Ri achin ri man cha'nin ta nipe royoval, ja rija' nic'o ruvi' utz chiquivech ri nimalej tak achi'a'. Y ri achin ri c'o uchuk'a' riq'uin pa ruvi' ri ru espíritu, rija' nim chuvech jun achin ri nuch'ec jun tinamit" (Proverbios 16:32). Stape' yojmevayin ca'i' oc va'in, jare' can utz vi nuna' ri káni-ma che. C'o chic juba' kuchuk'a' roma katojtoben chi c'o kuchuk'a' pa ruvi' ri karayibal. Vi yekatijoj ri kalc'ual chire ri mevayinen, rije' xtiqic'ul na cuchuk'a' richin xquequich'ec ri k'olój ri xtuya' ri Satanás pa quibey.

RI MEVAYINEN NUYA' RUCHUK'A' RI KA ESPIRITU

Ninimer ri kacukubabel c'u'x tok yojmevayin riq'uin utzilej nojibel y lok'olej ch'oven riq'uin ri Dios. Ri cukubabel c'u'x ri' nuya' ruchuk'a' ri ka espíritu. Ri profeta Alma chupan ri Vuj richin ri Mormon xtzijon chirij ri k'ij tok xuc'ul ri' quiq'uin ri ruc'ajol ri Mosia. Jare' xc'ulvachitej tok q'uiy yan juna' tizolin pe quic'u'x. Ri Alma janíla xquicot tok xunabej chi ri rachibil nimirinek ri quicukubabel c'u'x y nim ri cuchuk'a' riq'uin ri Ajaf. Rije' xquil yan re uchuk'a' re' roma janíla e ch'ovinek riq'uin ri Dios y janíla e mevayinek. Roma c'ari', rije' quic'uan ri espíritu richin ri ruya'ic lok'olej rutzijol y chuka' ri espíritu richin ri k'alajirisanic (tatz'eta' c'a ri Alma 17:3). Ri ruc'ajol ri Mosia e benek chic quiq'uin ri Lamani' 14 juna'. Chiri' xquich'abalij ri utzilej rutzijol chique. Ri Espíritu richin ri Ajaf xuya' ruchuk'a' ri quich'abel roma chi xemevayin y xech'o riq'uin ri Dios. Roma c'ari', janíla utz ri lok'olej samaj ri xquibanala' (tatz'eta' c'a ri Alma 17:4).

Quere' c'a nubij ri Ajaf chique ri vinaki' ri yemevayin chi utzil: "Ri Atata' ri nitzu'un pan evel, xcarutoj pa sakil'" (Mateo 6:18).

Tanaj 25

¿Achiqhe roma nic'atzin chi c'o kuchuk'a' richin nikak'et ki' che ri karayibal?

¿Achiqhe modo tok ri mevayinen nunimirisaj ri ruchuk'a' ri ka espíritu?

Tac'utuj chire jun chic vinek chi tutzijoj achiqhe modo xturusex tok xmevayin.

CH'AKA' CHIC MOCAJ RI UTZ YE'ANIC'OJ

Lucas 2:37; Alma 45:1; DyC 59:13-14 (nikaya' ruk'ij ri Dios tok yojmevayin)

Mosia 27:19, 23 (yojmevayin coma ri yava'i')

3 Nefi 27:1-3; Exodo 34:27-28 (yojmevayin richin xtikac'ul k'alajirisanic y etamabel pa ruvi' ri kitzij)

Alma 6:6; 17:9 (yojmevayin coma ri vinek ri man e c'o ta chupan ri K'ataj)

Hechos 13:2-3 (yojmevayin coma ri e uc'uey bey chupan ri K'ataj)